

मार्निंग डोगरी न्यूज़ बुलेटिन, समें. 09-20 Hrs

<><><><><><>

खास-खास खबरें

### Headlines

लोकसभा चुनां दे 7में ते खीरले गेड़ लेई चुनां प्रचार दा अज्ज खीरी ध्याड़ा ऐ। इस गेड़ तैहत पैहली जून गी 57 लोकसभा सीटें लेई मतदान होग।

जम्मू कश्मीर दे पुलस महानिदेशक आर.आर.स्वैन होरें प्रदेश जांच अजेंसी एसआईए गी आखेआ ऐ जे आतंकवादिऐं गी सजा ते आतंकी ढांचे दा 100 फीसद खात्मा जकीनी बनाया जा।

जम्मू प्रांतै च गर्मी दा कैहर बरोबर जारी, कल बद्धोबद्ध तापमान 44.8 डिग्री सैल्सियस दर्ज कीता गेआ। लोकें गी जरूरी एहतियात बरतने दी सलाह दिक्ती गई।

भारत दे युवा शतरंज खडारी प्रगनानंदा नै दुनिया दे पैहले नंबर दे खडारी मगनान कार्लसन गी नार्वे चैस 2024 दे त्रीए दौर च हराया।

<><><><><><>

### 7<sup>th</sup> Phase

लोकसभा चुनां दे 7में ते खीरले गेड़ आस्तै प्रचार अज्ज संजा खत्म होई जाग। इस शनिवार पैहली जून गी मतदाता बीजेपी दे वरिष्ठ नेता ते प्रधानमंत्री नरेन्द्र मोदी हुंदे सनें 904 मेदवारें दे भविक्ख दा फैसला करगंन। एह मतदाता 8 राज्यें ते केन्द्र शासत प्रदेश च 57 पार्लिमानी हल्कें च होग। एह चुनां पंजाब ते उत्तर प्रदेश च 13-13, पच्छम बंगाल च 9, बिहार च 8, ओडिशा च 6, हिमाचल प्रदेश च 4, झारखंड च 3 ते चंडीगढ़ च 1 सीट आस्तै होग। पंजाब च प्रचार दे खीरी ध्याड़े यानि अज्ज प्रधानमंत्री मोदी होर होशियारपुर च इक पार्टी रैली गी संबोधत करगंन। बीजेपी राष्ट्रीय प्रधान जे.पी.नड्डा होर अज्ज अमृतसर, फरीदकोट ते रूपनगर च पार्टी मेदवारें दे हक्कै च रैलिऐं गी संबोधत करगंन। दूई बक्खी आम आदमी पार्टी नेता ते पंजाब दे मुख्मंत्रि भगवंत सिंह मान होर बक्ख-बक्ख जिलें च रोड शो करगंन। एहदे शा पैहले कल कांग्रेस दी महासचिव प्रियंका गांधी होरें मंडी पार्लिमानी हल्के दी कुल्लु थाहर पर इक रैली कीती। उनें आखेआ जे हिमाचल प्रदेश च विधानसभा चुनां शा पैहले कांगेस नै वृद्ध पेंशन स्कीम दा मुद्दा चुक्केआ हा ते सत्ता च. आंदे गै इसी पूरा कीता गेआ। उत्तर प्रदेश च बीजेपी दे वरिष्ठ नेता ते केन्द्री मंत्री अमित शाह होरें कल 4 रैलिऐं गी संबोधत

कीता ते 1 रोड शो च हिस्सा लैता। दूई बक्खी समाजवादी पार्टी प्रधान अखिलेश यादव होरें दुधी च पार्टी मेदवार दे हक्कै च प्रचार कीता।

<><><><><><>

## RO Anantnag

अनंतनाग—राजौरी पार्लिमानी हल्के दे रिटर्निंग अफसर सईद फकरुद्दीन हामिद होरें राजौरी जिले दा दौरा लाया ते 4 जून गी होने आली वोटें दी गिनतरी आले कम्मं लेई तैआरिएं दा जायजा लैता। रिटर्निंग अफसर होरें मतगणना आले हाल ते स्ट्रांग रूमं निरीक्षण कीता। एह सारियां सुविधा राजौरी दे सरकारी कालेज च कायम कीतियां गेइयां न। वोटें दी गिनतरी लेई 7 हाल ते 7 स्ट्रांग रूम कायम कीते गे न तां जे 4 जून गी होने आली मतगणना आला कम्म रमानदारी कन्नै होई सकै।

<><><><><><>

## CAA

गृह मंत्रालय नै आखेआ ऐ जे केन्द्र सरकार नै बुधवार थमां पच्छम बंगाल, हरियाणा ते उत्ताखंड च सीएए तैहत नागरिकता देना शुरू करी दित्ता ऐ। जिनें नागरिकूं इस सरबंधे च आवेदन कीते दा ऐ। उनेंगी प्रदेश दी सरबंधी बाइख्तेयार कमेटी नै नागरिकता दित्ती ऐ। बंग्लादेश, पाकिस्तान ते अफगानिस्तान थमां आए दे हिंदू, सिक्ख, जैन, बौद्ध, पारसी ते ईसाई लोकें गी सीएए तैहत नागरिकता दित्ती जंदी ऐ। इसदे तैहत 31 दिसम्बर 2014 थमां पैहले भारत आए दे इनें लोकें गी नागरिकता दित्ती जाग।

<><><><><><>

## DGP-SIA

जम्मू कश्मीर दे पुलस महानिदेशक आर.आर.स्वैन होरें कल प्रदेश जांच अजेसी एसआईए मुख्यालय दा दौरा कीता ते एहदे कम्मै काजै ते कारकरदगी दी समीक्षा कीती। इस मौके उनेंगी सीआईडी आस्सेआ शुरू कीते गेदे “एन्कलेट” कार्यक्रम दे बारे च जानकारी दित्ती गेई। जेहड़ा प्रोद्योगिक पर अधारित ऐसी बवस्था ऐ जेहड़ी जमानत बारे सख्त नियम शर्ते गी लागू करना जकीनी बनांदी ऐ ते यूएपीए ते एनडीपीएस ते होरने फरार अपराधिगं पर तक्क रखने च मती कारी दी साबत होई सकदी ऐ जिंदे खलाफ अपराधिक मामले चलै करदे न, पर जेहड़े बार—बार अपराधें च मलव्वज पाए जंदे न। डीजीपी होरें एसआईए दे अधिकारिएं गी जोर देइयै आखेआ जे जांच दे कम्मं गी पूरी चाल्ली पेशेवराना ढंगै नै करन तां जे आतंकवादिएं ते आतंकवाद कन्नै जुड़े मामले च अपराधिगं गी पक्क गै सजा दोआना जकीनी बनी सकै। ध्यान जोग ऐ जे एसआईए फरार

आतंकवादिएं दिएं संपत्ति गी जब्त करने, उंदे बैंक खाते सीज करने ते उंदी हर नकलोहरकत पर तक्क रखने पर टकोहदा ध्यान देआरदी ऐ।

<><><><><><>

## Eye Donation

माहनू दे शरीर दे अंगें दे प्रत्यर्पण सरबंधी संगठन एसओटीटीओ जम्मू कश्मीर दे कम्में कारवाइएं ते कोश्टें दे सकारात्मक ते दिल बधाने आले नतीजे सामने आवा करदे न ते अंगदान लेई मते लोक अग्गे आवा करदे न। जम्मू दे सुपर स्पेशेलटी अस्पताल नै एसओटीटीओ संगठन दे समर्थन कन्नै इक हादसे च मारे गेदे व्यक्ति दियां अक्खां 55 ते 60 बरे दी उमरी दे दिखने च कासर दऊं नाबीना लोकें गी लाइयै उनेंगी दुनिया दिखने दा मौका दित्ता। एसओटीटीओ दे इस प्रक्रिया दे तालमेल अधिकारी इरफान अहमद लोन होरें इस कारवाई लेई मारे गेदे आदमी दियां अक्खां गी प्रेरत कीता जेहदे नै दऊं नाबीना लोकें दा अपनी अक्खीं कन्ने दुनिया दिखने दा सुखना सच होइ सकेआ। अक्खिएं दे प्रत्यर्पण आप्रेशन दा नेतृत्व डॉ. संजय काय होरें कीता। इस म्हीने कीता गेआ इस चाल्ली दा एह दूआ आप्रेशन हा।

<><><><><><>

## Samaba(byte)

फसल दी बाड्डी मगरा बची दी नडी गी अग्ग लाइयै फूकने कन्नै पर्यावरण दे कन्नो-कन्नी माल-मवेशिएं ते पक्खरुएं गी बड़ा मता नुकसान होंदा ऐ। इस्सै दे बारे च सांबा जिले दे राई-बाई सरबंधी अधिकारी मदन गोपाल सिंह होरें अपनी टीम कन्ने बन्ने आले इलाकें रामगढ़ दा दौरा लाया ते करसानें कन्नै मलाटी करियै उनेंगी खेत्तरे च अग्ग लाने करी होने आले नुकसान बारे दस्सेआ ते उनेंगी जागरूक कीता।

<><><><><><>

## Heat Wave

उत्तर भारत दे केइं सारे हिस्सें आला लेखा जम्मू प्रांतै च बी गर्मी दा जबरदस्त कैहर जारी ऐ। जम्मू च बद्धोबद्ध तापमान 44.8 डिग्री सैल्सियस रिकार्ड कीता गेआ। कटड़ा शैहर च 40, कटुआ च 46.1, सांबा च 44.7, उधमपुर च 42 ते रियासी च 41.7 डिग्री सैल्सियस तापमान कल दर्ज कीता गेआ ऐं लोकें गी सलाह जारी कीती गेदी ऐ जे ओ अपना बचाह करने ते प्रशासन आस्सेआ जारी जरूरी हिदायतें दी संजीदगी कन्नै पालमा करन। गीारती मौसम विभाग दे जम्मू दफ्तर दे प्रीाररी संसार चंद शम्र होरें आकाशवाणी जम्मू कन्नै गल्ल करदे होई आखेआ.



## Forest Fire

उधमपुर जिले दे जंगली इलाकें च अग्ग लगने करी जंगली संसाधने ते वन्य जीवन दा बड़ा मता नुक्सान होआ ऐ। आकाशवाणी जम्मू संवाददाता दी रिपोर्ट मूजब एह अग्ग उधमपुर ते जम्मू जिले दे बश्कार नाले दारसू जंगलें दे 5 थमां 5 मरबा किलोमीटर च फैली गई। मकामी लोकें भारतीय वायु सेना दे हैलीकाप्टर दी सेवा दी बी मंग कीती तां जे इस अग्ग पर काबू पाया जाई सकै। जंगलात मैहकमे ते मकामी लोकें दे जतन इस अग्ग पर काबू पाने च अजें तगर नाकाम साबत होए न। अगग सहालने आले मैहकमे मूजब खित्ते च हर दिन अग्ग लगने दियां 10 थमां 13 घटना पेश आवा'रदियां न।



## Reasi Fire

जंगली इलाकें च अग्ग लगने आली घटनाएं च बाढ़े गी दिखदे होई रियासी जिला दे जंगलात मैहकमा झोन तकनीक दी मदद लै'रदा ऐ तां जे इनें घटनाएं पर फौरी तौरा पर काबू पाया जाई सकै। साढ़े जिला संवाददाता कन्नै गल्ल करदे होई जिला जंगलात अफसर सुनील सिंह होरें आखेआ.



## Norway-Chess

शतरंज च भारती खडारी प्रगनानदे होरें क्लासिकल इवैअ च पैहली बारी नार्वे दे मैग्नस कार्लसन गी हराया। 18एं ब'रे दे इस होनहार भारती शतरंज खडारी नै नार्वे चैस-2024 दे त्रीए दौर च चिट्ठे मोहरे दे कन्नै दुनिया दे पैहले नंबरे दे खडारी कार्लसन गी मात दित्ती। प्रगनापंदा गी मकाबले दे शुरू च गै बढत थहोई गई ही ते आखरकार उनें इस बढत गी जित्त च तब्दील करी दितता। उनें 5.5 अंके कन्नै बढत हासल करी लैती ऐ।

